



REPUBLIKA E SHQIPËRISË

**PROKURORIA PRANË GJYKATËS SË SHKALLËS SË PARË
JURIDIKSIONIT TË PËRGJITHSHËM
FIER**

Nr. 178 Prot.

Data 01 / 07 / 2025

UDHËZIM I PËRGJITHSHËM

Nr. 77 , datë 01 . 07 . 2025

PËR

**KOORDINIMIN E VEPRIMEVE MES PROKURORIT PËR MARRËDHËNIET ME
PUBLIKUN, PROKURORIT TË ÇËSHTJES DHE DREJTUESIT TË PROKURORISË
LIDHUR ME PUBLIKIMIN E INFORMACIONEVE MBI ÇËSHTJET NË HETIM**

Në mbështetje dhe në zbatim të nenit 148 të Kushtetutës së Republikës së Shqipërisë, nenit 41 pika 1, nenit 42, nenit 43 shkronjat “dh” e “c”, dhe nenit 46, pikat 1, 2, 4 e 5, dhe nenit 108, dhe 108/a, të ligjit nr. 97/2016, “Për organizimin dhe funksionimin e Prokurorisë në Republikën e Shqipërisë”, i ndryshuar, neneve 103, 104, 105, 279 dhe 279/a të Kodit të Procedurës Penale, neneve 2, 3, 7, 10, 14 e 17 të ligjit nr. 119/2014 “Për të drejtën e informimit”, neneve 2, 4, 6 pika 2, 18 pika 3 shkronja “b”, 21 pika 3 e 28 të ligjit nr. 9887, datë 10.03.2008 “Për mbrojtjen e të dhënave personale”, i ndryshuar, ligjit nr. 9154/2003 “Për akivat”, neneve 14, 15, 16 të Udhëzimit të Përgjithshëm Nr.05, datë 30.07.2019 “Për marrëdhëniet me publikun në Prokuroritë me Juridiksion të Përgjithshëm” të Prokurorit të Përgjithshëm, si dhe aktet e tjera ligjore dhe nënligjore në fuqi,

U D H Ë Z O J:

**KREU I
DISPOZITA TË PËRGJITHSHME**

Neni 1

Qëllimi

1. Ky udhëzim i përgjithshëm ka për qëllim unifikimin e veprimtarisë në Prokurorinë pranë Gjykatës së Shkallës së Parë të Juridiksionit të Përgjithshëm Fier në marrëdhëniet me publikun dhe median për dhënien e informacionit në lidhje me hetimin dhe ndjekjen penale.

2. Ky udhëzim njëson dhe përcakton nga kush, kur dhe në çfarë mënyre mund të jepen të dhënat për hetimin dhe ndjekjen penale të veprave penale.

Neni 2

Objekti

Ky udhëzim i përgjithshëm përcakton masa të unifikuara për:

- a) Lehtësimin e bashkëveprimit ndërmjet prokurorit të çështjes, prokurorit për marrëdhëniet me publikun dhe drejtuesin e prokurorisë lidhur me dhënien e informacionit në lidhje me hetimin dhe ndjekjen penale.
- b) Përcaktimin e veprimeve që duhet të kryejë secili prej prokurorit të çështjes, prokurorit për marrëdhëniet me publikun dhe drejtuesin e prokurorisë për dhënien e informacionit në lidhje me hetimin dhe ndjekjen penale.

Neni 3

Përkufizime

Në këtë udhëzim termat e mëposhtëm kanë këto kuptime:

- a) “Informacion publik” është çdo e dhënë e regjistruar në çfarëdolloj forme dhe formati, gjatë ushtrimit të veprimtarisë së prokurorisë, pavarësisht nëse është përpiluar ose jo nga ky institucion.
- b) “Shërbimet për marrëdhëniet me publikun” në prokuroritë e juridiksionit të përgjithshëm kujdesen për informimin e publikut dhe medias në lidhje me veprimtarinë e prokurorisë.
- c) “Prokurori për marrëdhëniet me publikun” është prokurori i caktuar nga Drejtuesi i Prokurorisë për të mbikëqyrur të gjithë procesin dhe procedurat e marrëdhënies së prokurorisë me publikun.
- ç) “Koordinatori” është nëpunësi civil për marrëdhëniet me publikun i caktuar nga Drejtuesi i Prokurorisë për të ushtruar detyrat dhe përgjegjësitë sipas ligjit;
- d) “Media” nënkupton të gjitha nivelet dhe format e komunikimit, private, publike dhe të internetit, nëpërmjet shtypit, televizionit, radios ose shërbimeve të internetit;

KREU II

PARIMET E KOMUNIKIMIT DHE BALANCIMI I INTERESAVE

Neni 4

Parimet e komunikimit

1. Shpërndarja e informacionit tek publiku bazohet në parimet e mëposhtme:

a) Publiku ka të drejtën e marrjes së informacionit dhe mediat kanë për detyrë të japin informacione për çështje me interes publik, siç janë hetimi dhe ndjekja penale e veprave penale dhe të gjitha aktivitetet e tjera të prokurorive me juridiksion të përgjithshëm.

b) E drejta për marrjen e informacionit dhe detyrimi për dhënien e informacionit mund të bjerë në kundërshtim me parimet e tjera, siç janë, por pa u kufizuar në, mbrojtjen e të drejtave të tjerëve (sidomos të drejtat e të dyshuarve, të pandehurve dhe viktimave) dhe mbrojtjen e jetës private.

c) Në rast konflikti mes parimeve të përmendura më sipër, duhet të ruhet ekuilibri i duhur midis secilit prej tyre.

ç) Gjatë shpërndarjes së informacionit tek publiku, informacioni duhet të jetë objektiv, i saktë, i besueshëm, i qartë dhe i parashikuar në kohë.

dh) Shpërndarja e informacionit duhet të përpiqet të promovojë dhe ruajë transparencën dhe besimin e publikut tek institucioni prokurorisë.

Neni 5

Balancimi i interesave

1. Shërbimi për marrëdhëniet me publikun siguron qasje në informacionin për publikun lidhur me veprimtarinë e këtij institucioni.

2. E drejta e publikut për informacion balançohet me përgjegjësinë dhe kompetencat e prokurorisë në funksion si të mbrojtjes së hetimit dhe ndjekjes penale, ashtu dhe mbrojtjes së sigurisë publike.

3. Vëmendje e veçantë duhet t'u kushtohet mbrojtjes së jetës dhe sigurisë të viktimave, dëshmitarëve dhe të drejtës së privatesisë.

4. Prokurori i çështjes dhe prokurori për marrëdhëniet me publikun i kushtojnë vëmendje interesit të ruajtjes së fshehtësisë së hetimit kur tejkalon interesin e publikut ose interesit të të pandehurit kur tejkalon interesin e publikut.

KREU III

ORGANIZIMI DHE FUNKSIONIMI I SHËRBIMIT PËR MARRËDHËNIET ME PUBLIKUN NË PROKURORI

Neni 6

Marrëdhëniet me median

1. Vetëm shërbimi për marrëdhëniet me publikun është i autorizuar, në mbështetje të legjislacionit në fuqi, në veçanti ligjit për të drejtën e informimit, ligjit për mbrojtjen e të dhënave personale dhe dispozitave të këtij udhëzimi, të informojë publikun për hetimin dhe ndjekjen penale të veprave penale, si dhe veprimtaritë e tjera të prokurorisë.

2. Prokurori i marrëdhënieve me publikun udhëheq dhe mbikëqyr shërbimin e

marrëdhënieve me publikun.

3. Koordinator i marrëdhënieve me publikun është nën autoritetin e prokurorit të caktuar për marrëdhënieve me publikun.

4. Çdo informacion i ofruar nga shërbimi/zyra e marrëdhënieve me publikun duhet të marrë pëlqimin paraprak të drejtuesit të prokurorisë.

5. Shërbimi/zyra e marrëdhënieve me publikun i përgjigjet kërkesave të publikut dhe të mediave dhe merr iniciativa për të informuar publikun, nëpërmjet medias, por ngjarjet kriminale.

Neni 7

Koordinimi i brendshëm

1. Drejtuesi i prokurorisë, prokurori i caktuar për marrëdhënieve me publikun, prokurori i çështjes bashkëpunojnë ngushtë ndërmjet tyre dhe në afatin sa më të shkurtër kohor, që t'i ofrojnë informacionin e kërkuar publikut.

2. Prokurori i marrëdhënieve me publikun njofton menjëherë drejtuesin e prokurorisë për çdo çështje me ndjeshmëri, seriozitet dhe rëndësi të veçantë lidhur me imazhin e prokurorisë, për shkak të natyrës së fakteve ose natyrës së subjekteve të përfshira ose çështjeve ligjore që lindin, me kompleksitet të veçantë dhe veçanërisht delikate.

3. Prokurori i marrëdhënieve me publikun, sipas kërkesave të drejtuesit të prokurorisë, bashkëpunon për ecurinë e ndjekjes penale të rastit me koordinatorin e zyrës për marrëdhënieve me publikun për mbledhjen dhe analizimin e informacionit që duhet të komunikohet.

Neni 8

Prokurori i çështjes

1. Asnjë koment publik nuk duhet të bëhet, për asnjë rrethanë që ka lidhje me ndonjë hetim të hapur ose ndjekje penale, pa pëlqimin paraprak të dhënë nga prokurori përgjegjës i çështjes.

2. Prokurori i çështjes është i detyruar të përgjigjet me shkrim brenda 2 (dy) dite kalendarike, mbi kërkesat e prokurorit për marrëdhënieve me publikun për të shkëmbyer informacion rreth hetimeve dhe ndjekjes penale në vazhdim.

3. Çdo prokuror është i detyruar të informojë brenda 2 (dy) ditëve, me shkrim, prokurorin për marrëdhënieve me publikun nëse është duke hetuar një çështje me karakter të ndjeshëm për publikun, duke përfshirë, por pa u kufizuar: masën/masat e sigurimit personal dhe pasuror të kërkuara dhe të vendosura nga gjykata, marrjen të pandehur dhe dërgimin në gjyq, vendimin për dënimin e të pandehurit/pandehurve apo konfiskimin e pasurive.

4. Prokurori i çështjes njofton prokurorin e marrëdhënieve me publikun duke i dërguar nëpërmjet postës elektronike zyrtare @pp.gov.al: një përmbledhje të faktit penal, numrin dhe vitin e procedimit penal dhe sipas rastit, masën/masat e sigurimit (personal dhe pasuror) të kërkuara dhe të vendosura nga gjykata, marrjen të pandehur dhe dërgimin në gjyq, vendimin për dënimin e të pandehurit/pandehurve apo konfiskimin e pasurive.

5. Pas marrjes së njoftimit nga prokurori i çështjes, prokurori i marrëdhënieve me publikun njofton menjëherë drejtuesin e prokurorisë dhe i kërkon pëlqimin përpara publikimit të njoftimit për

median.

Neni 9

Procesi penal

1. Vetëm prokurori i marrëdhënieve me publikun është i autorizuar të adresojë mediat para, gjatë dhe pas seancës në gjykatë.

2. Kur është e nevojshme, prokurori i marrëdhënieve me publikun komunikon ose konsultohet me zyrën e marrëdhënieve me publikun të gjykatës përpara se të shpërndajë informacionin për publikun dhe mediat.

3. Para fillimit të seancës dhe gjatë seancës në gjykatë, prokurori i marrëdhënieve me publikun mund të shpjegojë pse prokurori ka vendosur të ndjekë penalisht të pandehurin(t). Të dhënat e mëtejshme rreth seancës dëgjimore i rezervohen gjykatës. Prokurori i marrëdhënieve me publikun refuzon komentet mbi rrjedhën e procedurave dhe vendimet e gjykatës.

4. Në rast se gjykata ka marrë një vendim kundër të cilit mund të paraqitet ankim, prokurori i marrëdhënieve me publikun mund ta informojë publikun nëse prokurori i çështjes do të apelojë ose jo vendimin e gjykatës. Në rastet kur ushtrohet ankim kundër vendimit të gjykatës arsyet e ankimit mund t'i njoftohen/shpërndahen publikut.

5. Gjatë seancës në gjykatë, prokurori i çështjes, duhet të ndjekë rregullat dhe vendimet e gjykatës për sa i përket marrëdhënieve me publikun dhe mediat në sallën e gjyqit.

KREU IV

PËRGJEGJËSIA DISIPLINORE, ZBATIMI, HYRJA NË FUQI DHE PUBLIKIMI

Neni 10

Përgjegjësia disiplinore

Shkeljet e përcaktimeve të këtij udhëzimi të përgjithshëm nga prokurori, oficeri/agjenti i policisë gjyqësore i seksionit/shërbimeve ose nepunësi civil apo punonjësi i prokurorisë, kur nuk përbëjnë vepër penale, përbëjnë shkelje të disiplinës në ushtrimin e detyrës dhe/ose shkak për fillimin e hetimit disiplinor ndaj secilit prej tyre.

Neni 11

Zbatimi dhe mbikëqyrja

1. Për zbatimin e këtij udhëzimi të përgjithshëm ngarkohen prokurorët, prokurorët dhe koordinatorët e marrëdhënieve me publikun, oficerët e policisë gjyqësore dhe nëpunësit civil në prokurori.

2. Me mbikëqyrjen e zbatimit të këtij udhëzimi ngarkohen zëvendës drejtuesi i Prokurorisë, dhe prokurori i marrëdhënieve me publikun në Prokurorinë Fier, të cilët për ecurinë e zbatimit të tij informojnë periodikisht drejtuesin e Prokurorisë.

3. T'u njoftohet ky udhëzim përmes postës elektronike zyrtare @pp.gov.al. të gjithë

prokurorëve, oficerëve të policisë gjyqësore të seksionit dhe nënpunësve të administratës në Prokurorinë e Juridiksionit të Përgjithshëm Fier.

4. Me kryerjen e njoftimeve ngarkohet specialiste e IT-së dhe sekretaria.

Neni 12

Hyrja në fuqi dhe publikimi

Ky udhëzim i përgjithshëm hyn në fuqi menjëherë dhe publikohet në faqen e internetit të Prokurorisë pranë Gjykatës së Shkallës së Parë të Juridiksionit të Përgjithshëm Fier.

DREJTUESI I PROKURORISË

Elion MUSTAJ

